

四庫全書

集部

欽定四庫全書

集部

可齋續纂前卷

一至三

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官學正臣湯垣

謄錄舉人臣李達泰

可齋續葉原序

雜稿鋟梓出於兒輩哀次中多少作未嘗不動壯夫之  
悔一二季間復應酬又欲從而續之姑徇其意然軍書  
蠡午中安有好語徒重作者笑寶祐甲寅四月既望

欽定四庫全書

原序

欽定四庫全書

可齋續藁前卷一

宋 李曾伯 撰

表

賀寶祐改元 京湖制司

常久御時丕紹鴻圖之永乾元敷號聿偕鳳歷之更一  
札誕頒八荒胥懌竊以自天申命付予有家開寶真人  
肇啟垂基之慶嘉祐盛際允推必世之仁宣二祖之重  
光開千齡之景運載稽家數允協休符恭惟皇帝陛下

寅畏嚴恭剛健篤實德新日而又日勅命載歌時後天  
而奉天洗心以易歲逢十閏序轉三微答皇穹譴告之  
靈取聖化解張之義于予改是宏濟登茲臣敬布王言  
具孚民聽幸聯周翰頌天子之萬年願奉漢正還官儀  
于三輔

賀寶祐改元

龍圖閣

兼三御物仁當必世之新謂一為元歷啟卜年之永渙  
敷大號泰格兩間竊惟以旱而譏乾封因水而易地節

應以文不以實猶莫答於天威考諸古驗諸今孰若繩  
於祖武恭惟皇帝陛下兢兢猶舜翼翼若文守位以仁  
結人心於能久遇裁而懼啟王業之復興仰稽開寶垂  
統之艱難爰襲嘉祐躋時之熙洽輯隆名而誕告與衆  
宇以惟新於萬斯年自今以始臣班聯清禁慶阻丹墀  
出河洛之圖書將還一統賡江漢之詩雅用祝萬年

賀寶祐改元

京西帥司

天位握符將邁歷年之永日官更歷爰興嗣歲之元和

格垓埏慶闕宗社恭惟皇帝陛下應天以實必世而仁  
定能靜靜能安由大學之明德變則通通則久本神化  
以使民轉否運而嘉祥祖乾綱之成憲寶思遺我知創  
業之維艱祐取尚賢念保邦之不易載寢美號懋衍丕  
圖臣猥領師干竦聆渙汗豈惟癯老扶杖而聽詔書當  
使遐陬稱藩而奉正朔

謝宣賜歷日

癸丑

更元漢歷式臨地統之初錫命楚封爰謹人時之授乾



坤順序華夏同文恭惟皇帝陛下道契五三運逢千一  
化陶獨播熙然溫厚之仁琴瑟載調昭若清夷之度繼  
開寶嘉祐綿延之休命新車攻吉日赫奕之治功必世  
乃孚後天其永臣敢不欽承殊渥誕布成書比及三年  
雖乏陟明之績有能一日願殫必葺之忠

賀立皇子

京湖制司

新元發號方交泰象之三明詔選宗喜索震爻之一參  
諸大衍必也正名恭惟皇帝陛下光紹丕基識超遠覽

事事而廟見思洪業之艱難親親以尚賢法前猷之果  
斷時惟國本決自宸衷以祖宗之心為心何私之有謂  
兄弟之子猶子在禮則然社稷奠安天人悅豫臣迹縻  
荆閭忱切華封襲熙而宣重光庶永綿延之祚教事而  
諭諸德願成岐嶷之資

賀立皇子

湖北帥司

更元嗣歷肇新地統之年立愛正名近篤天彝之義臚  
傳吉日彪列前星恭惟皇帝陛下祇適大猷聿開休運

謂惟天惟祖不輕付托之傳而有國有家以念延洪之計豈特嘉祐老臣之累疏恪遵紹興元子之舊章克戡克岐蔚有成人之器丕承丕顯益綿奕世之基赤社載封洪圖增固臣聳聆慶事屬阻窮邊嘉與吏民欣逢一札十行之布願言輔導俾臻九德六行之全

賀冊瑞國公主

皇帝為父萬年益衍本支之茂王姬下后一等晉疏湯沐之封喜動宮闈慶闕家國恭惟皇帝陛下堯仁睦族

舜智察倫治以身先克謹翠襦之戒愛由近始宜新組  
帶之儀秩視分茅祉均綿祇臣猥叨分閭欣際展親沁  
幄承恩未數東都之盛事漢濱流化第增南國之歡聲

謝宣賜夏藥

壬子

彤庭䟽綺軫萬甲之扞邊珍劑實奩按三庚而傳驛禮  
隆體貌感極肺肝伏念臣職忝幹方才慚課效雖臣心  
孔疚每思蚤夜之飲冰而民瘼未蘓寧免閭閻之咨暑  
敢期衰薊上沐眷綏畀之漢札之十行賚以炎經之庶

品光華宸渥蠲滌宿痾恭惟皇帝陛下理國猶身躋民  
於壽更化善治千年一遇於南薰序情閔勞六月載懷  
於北伐金藏在候錫寵自天臣敢不精意服休鞠躬盡  
瘁扶持弱質豈徒莊叟之衛生推廣洪恩咸使舜民之  
解慍

謝宣賜夏藥

癸丑

藩方玩歲閱南陸之炎威詔旨對時錫西山之珍劑鞠  
躬拜賜鏤骨銜恩伏念臣自癸水之一來凡庚金之四

歷薰蒸霧潦老筋力於驅馳蓬勃煙埃弊精神於酬酢  
過沐中宸之儼渥游勤上藥之匪頒於粲精奩增光遠  
壘恭惟皇帝陛下兩儀合德一視同仁共武飭戎屬當  
周原北伐之月阜民解愠復見舜世南薰之風爰念邇  
臣俯加聖惠臣敢不益殫勞瘁思報生全推廣君仁以  
起一方之病請求民隱冀臻六氣之和

謝宣賜臘藥

錫壤罔功三聞臘鼓寶奩實劑載被溫綸佩渙渥之優

隆撫微躬而激烈伏念臣護風數處在天一方序屬折  
膠又過燕北杪離之候師懷挾纘猶餘漢屯鞞瘞之憂  
敢期獲獲之軫憐遽辱珍良之分賚同霑春育頓解宿  
痼恭惟皇帝陛下道適平康德垂仁厚遣戍衛國閑其  
雨雪之時以予馭臣著之歲月之典衰蹤何幸嘉惠屢  
承臣敢不思稱服休勉圖效報拜手萬金之品謹護熊  
經誓心一節之忠仰酬鴻造

謝特賜銀絹

癸丑

封人願聖壽顧無品貢之珍天子錫諸侯寵有幣餘之  
腆恩釀眷厚感極愧浮伏念臣猥任蕃宣未酬簡拔倣  
漢朝之慶事遙祝玉卮繼荆守之前修莫陳金鑑敢圖  
睿渥乃辱殊頒美鐔燦爛於滿籛繁總森羅於厥篚龍  
光遠逮愚分曷勝恭惟皇帝陛下憲天聰明撫時熙洽  
以慈為寶相傳奕世之寬仁其言如絲以厲在位之正  
直馭臣曰予惟帝之休臣敢不仰戴厖洪益加精白禮  
儀三百之賚服用無窮春秋八千之期頌祈有永



謝特賜銀絹

甲寅

月紀誕彌偕效封人之祝日宣蕃錫脩膺內府之珍禮  
極優隆感深激烈伏念臣猥分邊戍欣際昌辰舉首嵩  
呼願介阜岡之永寓忱荊貢直猶行潦之微敢期玉藻  
之眷綏爰侈金縉之頒賚啟奩交燦端笏載祇恭惟皇  
帝陛下運接千齡光被四表寶惟賢而不貴物遠格邇  
安衣在笥而弗及私臣欽民乂王言作命天寵在師臣  
敢不被服此恩砥礪其節視古有功之貺曷稱受藏繼

今休德之承惟知精白

謝宣賜香茶

壬子

受任戎行三值朱明之律傳宣貂使載頒清燕之珍服  
命優隆拊膺激烈伏念臣護風承乏愒日罔功征築雖  
勞未果腥羶之滌蕩調度孔急不勝湯火之煎熬正當  
下土之溽蒸忽辱上方之錫賚爐烟霏瑞甌雪浮花分  
從黼衣之邃嚴貯以寶奩之璀璨光華遠及氣味頓增  
恭惟皇帝陛下位正昀凝德參離照理明欲淨常存淡

泊之心道久化成咸仰馨香之治馭臣曰予施惠以時  
臣敢不一飲知恩三薰拜賜望紫皇案吏之侍阻預班  
聯還玉川山人之家尚誇寵渥

謝轉宣奉大夫

課會索班寶閱歲華之十思加綸告首躋品秩之三祇  
命踰涯拊躬增愧伏念臣猥承先緒誤際明時毫髮無  
長豈憚服勤之久尺寸以上常虞取數之多飽更邊閫  
之風煙叨積從塗之月日揚州一夢恍若昔然楚戶三

霜條其今矣不自覺光陰之迅速詎敢計班資之崇庠  
官簿程勞文階序進念燭武無能之已甚視釋之不調  
以何榮竊此寵休歎焉稱塞恭惟皇帝陛下道符常久  
智合離明爵祿馭臣蓋得周王八柄之典黜陟咨岳且  
稽虞朝三考之規遂使踈蹤亦叨殊渥臣敢不益殫駑  
鈍仰戴鴻施報國何功惟恐犯惡盈之戒乞身而退庶  
幾酬知止之心

謝蕪夔州路策應大使

幹方南紀共二非才備援西鄰兼三有旨屬值時之孔  
棘爰祇事以敢辭伏念臣自揆庸人猥膺煩使三霜楚  
戶曾微橫草之勞一水吳鄉久作投林之想未遂累章  
之抗請甫承尺札之勉留敢謂眷懷復分憂顧既以漢  
水方城扞關之要責且由瞿塘滯潏越境而俾謀豈惟  
示脉絡之貫通正欲使首尾之應接碩窮以技詎暇魚  
營然念同舟共濟而吳越猶當一心擊柝相聞而邾魯  
豈容異視雖近事不可以前規而論而虛名未足為實

患之支誓殫勤勞敢計利害諏日布九重之命護風添  
一面之防非藉鴻休曷勝蟲負恭惟皇帝陛下獨昭睿  
斷誕布皇靈科瑣作新將以衛東南之頭目興圖披覽  
盖尤重荆益之咽喉故諭蜀之檄告甫聞而救邢之簡  
書已播遂令不武亦忝共圖臣敢不協膂力之謀罄輔車  
之助第自維涇楫戒猶慮於衣衾願相保樊牆救靡勞  
於冠髮

謝除端明殿學士

受任幹方曾乏戎旃之績疏恩進律俾聯書殿之班三  
錫命而莫辭九頓首以祇拜竊以承明之直素高侍從  
之華宗祁在定武而升猶謂乘邇之無狀韓絳自慶州  
而擢蓋由易鎮之有行豈惟增儒學之榮所以重藩臣  
之望么微何者忝竊得之伏念臣躑躅孤蹤間闕再牧  
以書生習乃墮矢人函人之倫與俗吏從猶親倉氏庫  
氏之役揆力莫勝於共二弓休已瀆於再三敢謂宸知  
弗加屏棄顧四閱星霜之歷凡幾叨雨露之恩未能陪

木石於故邱乃獲綴藥珠於碧落矧地連夔子命兼應  
於齒屑雖天遠瀛洲示將升其步武渥隆責重才薄感  
深恭惟皇帝陛下德運乾剛化成常久遣戍役衛中國  
修自治以規恢體羣臣懷諸侯揭至公而磨礪愧無尺  
寸寵有絲綸臣敢不祇荷厯洪誓殫精白躬承顧問無  
從拜賜於龍盆力盡驅馳願許收身於馬革

賀襄樊告捷

敵兵入境窺新壘以憑陵王旅效勞奉皇威而汎掃慶



闢中國威震外方眷惟三峴之經營實出九重之謨斷  
雖封疆之當守固隣敵之必爭三年之間每伐謀而輒  
勝一歲於此廼挾忿以再侵自秋課之屢聞知冬防之  
肆侮虢虎之闕逐鹿而來以數萬衆之旄頭幾六十里  
之陣脚機謀巨測事勢亦危賴城高而池深與兵精而  
食足士百其勇將一乃心遂乘其暮氣之歸隨奏此宵  
征之捷所營大入猶傾厦之莫支執訊以還盡空壁而  
亟遁兵聲大振敵魄已消是皆宗社之靈迄保藩籬之

固臣負乘正虞於致寇纓冠且迫於救鄰念此城乃南  
北氣運之所關顧何力而東西聲擊之可應倏聆吉語  
欣釋肝憂恭惟皇帝陛下先物沉幾知人善任懸象高  
拱殊方若日之照臨聖武布昭羸卒聞風而披靡茲焉  
雋克端自圖回臣喜極贊揚幸逃曠責知數蒙於天祐  
懼沓至於事機當桑空蠶死之期雖浸衰於敵運為弓  
勁馬肥之備願豫蓄於帥謀

謝詔書獎諭

邇城敵愾幸吉語之徹聞中宸閔勞錫恩言而加獎叨  
榮特異負愧采深竊惟襄樊用武之區此固強敵必爭  
之地中更蕪廢久委麋鹿之場稍後經營幾成狐兔之  
穴賴睿斷挈還於舊物然異謀睨視於並鄰三閱星霜  
幾驚烽火比草青而既至蒲冰合以復來詎意宵征荐  
騰晝捷彼方連營挾忿以報東門之役我乃一鼓作氣  
遂收中山之功皆宗社之有靈與將士之戮力臣職雖  
專閫智乏折衝登陴授兵麾紅旗而決勝銜枚赴敵冒

白刃以捐軀由因人成事以致斯若貪天為功而豈敢  
君之訓也臣何力焉恭惟皇帝陛下先物沉幾好謀能  
斷有常而立武事固非蠢爾醜類之敢撓高拱而操成  
功猶且臣子小勤之必錄致頌明詔俯賚孤蹤臣敢不  
肅承天漢之章加謹風寒之護司馬獲而鄭皆喜顧愚  
衷未敢以為安得臣在而晉尚憂願聖算圖其未至

謝宣賜臘藥

癸丑

職忝中權四見嚴凝之序恩頒上藥載膺溫密之宣拜

手對歆拊躬戰栗伏念臣久叨麤使浸迫頽齡搯關中之  
吭愧精神之不逮居天下之脊嗟氣脉之未蘓屬當  
霏雪之時又辱湛露之渥奮陳鏐白餌列鼎丹起衰繭  
之風痾侈寵榮之晝錫恭惟皇帝陛下遇臣以禮視民  
如傷以楚師多寒每示拊循於營壘雖虞人不臘益加  
保護於疆陲爰念愚蹤洊加聖惠臣敢不感銜君賜消  
弭民咨醫能治之盍俾回於強證臣今耄矣願許乞於  
餘骸

謝宣賜香茶

甲寅

分闌固功屆南交之炎溽寶奩頒賚薰內府之芳甘捧  
戴寵榮感懷激烈伏念臣驅馳寢老玩愒無庸十暑更  
嘗祇用心之茶苦一寒孑立乏延譽之荃芬御爐脩錫  
於龍煤貢焙且分於鳳夸撫之溫綈重以精鐐侈清燕  
之二珍俾緇塵之一洗恭惟皇帝陛下平由謙施照並  
離明阜民之薰猶見衣裳之化求士如渴不遺葑菲之  
材致使微蹤洊叨大賜臣敢不登嘉下拜紀德中藏滿

腹風生當詫兩旗之勝品舉頭露禱惟堅一辦之精忠

可齋續蒙前卷一



欽定四庫全書

可齋續藁前卷二

宋 李曾伯 撰

啟

代男除耜田令兼制機謝宰執

外聞舉親俾執軍書之役上恩及幼兼叨甸楮之司微  
大鈞播物之無垠豈小子成人之有造鞠躬祇渥感德  
淪肌竊惟國之所重在戎古不以私廢職如祁午可祁  
奚所以示公倘魏戍能魏舒其敢弗用固宜近制許置

底僚然而奉常設屬斯列王朝佐史等流特共子職修  
焉並命必也當才如某者涉世未深力學尚淺猶金根  
車之多誤字未識竒繼鐵爐步之相傳書宜溫故昨者  
備淮壖之履屐已而指嶺嶠以擔簦縻粟是羞荷薪靡  
克甫畢凱風之戚載從霏雪之行婉婉幕中非不富竒  
才於荆楚栖栖膝下乃令問舊步於邯鄲朝扣九閤夕  
頌一札遂吹竽於黛耜且珥筆於青油盧仝之有添丁  
果充耘而為國韓愈之得阿買姑使寫以張軍不幾沐

猴而冠母乃樂鶚以鼓恩深橐籥量溢鉗罍恭惟某官  
厚德承乾至公用泰帝爰賴同心於大政世已知拭目  
於太平俾爾服在大僚豈但橐茅之並進惟公克勤小  
物至於細補以兼收致使么微亦被袂扎某敢不律身  
由禮服訓教忠思稼穡之艱難一飯敢忘於埏埴乘文  
書之間暇寸陰願贊於綢繆

兩考謝宰執

昨收上流猥任封疆之寄承休大造再更歲月之書爰

滌柔緘用攄謝悃伏念某誤膺東掖洊玷蕃宣以天時  
則然不幸跨三年之間值兩潦至地勢如故今乃分一  
州之列守四城勉殫夙夜之祇勤凜懼春秋之責備願  
休徵戍弼有類於觸藩坐閱桑陰駒倏驚於過隙尚此  
遐曠瘵之戾居然載覆幬之仁恭惟某官掌運坤輿手  
扶泰道規恢王業將成太原六月之功科瑣軍書每徇  
金城七日之奏致容疎陋猶效驅馳轉眼秋聲曷若解  
更張之瑟乞身晚節期於播塊坻之鈞

三考謝宰執

任周翰之來旬曾微厥效揆虞廷之考績茲及是時凡  
翫惕以不虞皆高明之所覆亟裁斐牘少控謝悰伏念  
某猥以庸才誤膺煩使壯心零落猶且問於舉鞭老色  
侵尋幾不堪於看鏡維此六月比及三年自知物理之  
已盈且覺人情之浸玩殆猶東野之馬夫何求哉願為  
首邱之狐不翅足矣屬對桑陰之過眼豈勝薇戍之驚  
心非有此天孰為之地恭惟某官陶成萬化器使羣材

惟時而亮天工允作皇家之柱石以歲而會吏治每持公道之權衡致使么微獲迓瘵曠某敢不分陰畢力寸地知恩仰承漢丞相之憂邊固弗忘於必葺俯徇和大夫之請老母俾賦於不歸

回袞憲袖啟

星占郇舍猶紫氣之望公雪滿剡溪乘清風而過我同朝自昔當路載逢甫瞻轡玉之光華遽辱駢珠之錯落一謙厚甚三復慙然恭惟某官梗枏豫章之材湛盧豪

曹之器彊陞在目向曹草檄以卻秦鄉國關心自請登  
車而諭蜀駟野久推於蕃息犴扉允藉於平反月黑風  
高幾更多事霜寒水勁一節十年我知共濟於波濤人  
莫能窺其涯涘興懷睿眷易命使華訪秦人之桃源雖  
不過邨邨之步入愷之之蔗境蓋將近河漢之津為國  
元龜需公華髮某老猶護塞喜遂聯臺有懷劍棧之遊  
全如春夢同作洞庭之客正在歲寒曾乏好辭用酬雅  
意士別三日甚慚吳下之阿蒙我有二天所恃冀州之

刺史

田常德楊守袖啟

蜀無他楊久聞公之籍甚道有苦李肯過我以顧之瞻  
熊軾以載欣捧驪珠而三復恭惟某官岷峨聲聞闕洛  
心傳萬里造朝漢甘泉枚徐之望三湘佐閩唐河陽溫  
石之流胡上卷之聿隆乃外庸而自詭民方歌袴成喜  
趣瓜挹江芷之香小駐楚騷之國訪桃源之勝肯論魏  
晉之時誕揚一府之仁風坐洗五溪之瘴雨不容席暖



即迂詔溫某老尚守邊幸而聯事叙舊幾同於春夢論  
交方托於夏盟君薄淮陽耶決不致久淹之嘆吾在汶  
上矣恐莫酬共濟之心

回新四川余制置袖啟

舉杜預代荆將重上流之形勢遣相如諭蜀乃為西道  
之主人端由聖上之屬心豈在庸夫之饒舌雄辭過巽  
盛德執謙恭惟某官撐天柱地之才鞭風駕霆之手姪  
夷簡可相久膺當宁之眷懷客薛公所言屢奏在邊之

籌策源深流遠實茂英蜚江淮皆所知名朝廷方將大  
用弗搖山嶽坐弭波濤屬將清西風元規之塵固不容  
東山安石之卧見大夫無可使者宜為朕行古膚使其  
猶劣諸徒得君重爰建大元帥之旗鼓晉陞小司寇之  
橐簪號令甫行於巴渝巫峽之間威聲已振於蓬婆滴  
博之外當路得君如彼經濟豈難今世舍我其誰奮庸  
直易某但知斂衽預喜彈冠擬人而不以倫多見其弗  
知量為公朝賀托大國鄰繼茲肝膽之相孚無復藩牆

之自異今日既盟之後其毋忘共濟之心曷月予還歸  
哉庶俾遂早休之志

回梁制參

龍墀渙渥虎帳參謀奎閣光華夙著潛卽之望戎旃陪  
佐式資上介之賢忻聞紫氣之東來重喜碧雲之暮合  
恭惟某官澄清雅志開濟奇才萬里風寒早試籌邊之  
略十年雲岫寧忘憂國之心時望固所共歸公論久而  
自定下喬木入幽谷曷不屑以惠來就熟路駕輕車姑

何妨於游戲今君行得所矣謂吾有此客乎竊揣上意  
蓋二子之備魯猶當方面行四履之賜齊某弩末技窮  
刀頭夢切故人相值式酬何時樽酒之情國事方殷全  
藉妙手奕碁之助

轉宣奉大夫謝宰執

藩從服勤足十期之會課巖廊敷命首三品以升階被  
綸綍以維新佩甄陶之有自伏念某誤膺煩使實乏他  
長歲月侵尋悵頭顱之已老疆陲閱歷茂毫髮之可書

由踰淮歸浙以投閒暨度嶺來荆而受任星霜斯邁雨露常濡未能寬宵旰之懷惟恐犯春秋之責積成寸分遂入鈞衡進之亞光祿之班於以重元戎之寄僥踰至此造就使然載稽釋之不調之年曾無虛日三歎李廣弗侯之命乃有此天恭惟某官經國大儒濟時碩輔弊羣吏以廉善豈惟得周典六計之規咨四岳以陟明又兼取虞廷三考之制致令庸陋亦冒寵榮某敢不頂踵銜恩縻捐誓報矐言負乘祇虞取數之過盈許問邱樊

庶遂乞身而知止

兼夔州路策應大使謝宰執

風寒備北正虞負乘之譏天顧在西俾奉簡書之援視  
鞭所指斂衽敢辭揆綿力以弗勝服恩綸而祇懼竊惟  
國於東南控二長之勢夔介荆益猶一身之吭必如虞  
虢之相為齒脣焉可楚越之自立肝膽此其疇昔兼置  
使存然豈勞信陵親邯鄲之行固亦無霄雲致賀蘭之  
請僅聞常戍類假虛聲茲局面之頓殊將旄頭之共禦

允為重任可付庸人如某者老矣護遼久焉懷土類千  
鈞之弩末不足發機向百尺之竿頭豈容進步我園正  
嗟於孔棘已田奚暇於他芸顧此何時而能為役念蹊  
徑五溪之密接而江濤三峽之相通若鹿之犄角然庶  
乎能守非蛇之首尾應其曷克支苟惟擊析之相聞敢  
避同舟而共濟以扶持是實覆幬之恭惟某官掌運坤  
輿力回泰道以靜制四方之動惟明燭萬事之機歌江  
漢以平夷日以異紹復中興之業諭巴蜀而遣使天其

籙選定新集之民慮震其鄰用孚厥號是固輔車之義  
在詎容手肘之力艱社稷有靈願釋高屋建瓴之慮封  
疆各保庶無纓冠被髮之勞

除端明殿學士謝宰執

鴻鈞播物新科瑣於三邊麟殿通班昭寵綏於一介循  
牆莫避踏地奚勝竊以廬直承明序高侍從君實之清  
名始稱仲儀之素望乃宜否則易守成都嘗除獻肅或  
以夙在定武用賞景文倘成績之無聞將前修之有覲



如某者粗供任使見謂庸人歲月驚心寄浮萍於江漢  
風埃眯目懷落木於家山尚當戍役之上流是豈書生  
之長技筆路藍縷何有新功荆棘蒙茸未全舊觀師老  
而扼吭搏虛之僅立財匱而沃焦捧漏之愈艱久慚陪  
筆橐於甘泉只合掛衣冠於神武無能何取求去乃遷  
躡升筍玉之階俾在藥珠之選豈欲示朔方之精采且  
將重西土之喉衿顧諸儒翰墨之間所當處此如平生  
夢寐之際豈敢到茲才薄恩隆感深愧溢恭惟某官立

生民極主斯道盟聲色不動而國勢日尊氣類相孚而  
人材雲合扶偏補弊有一德以享天心開誠布公總衆  
職以稱上意伊侯誰在亦我儀圖某敢不德佩楮中力  
殫弩末龍盆承渥敢希主眷之遭逢鵠閣酬知誓竭臣  
忠之報效益堅晚節庶遂早休

襄樊捷賀宰執

敵丘侵塞正懷不測之虞新壘策勛再奏非常之捷功  
歸上宰威震外邦睠襄陽自經理以來而敵國蓄窺圖

之久頃草青而入隨一戰以師奔茲水涸復來襲羣首  
而蜎聚賴城高而池險與食足以兵精將一乃心士百  
其勇乘其暮氣肅若宵征遂以六千之師破彼十萬之  
衆因人成事恃國有靈某猥總師干獲承廟算負乘致  
寇愧禦侮之非才纓冠救鄰且值時之多備幸聆凱報  
上釋傾憂恭惟某官厚德贊乾至公用泰經文緯武之  
略足以濟時聚精會神之間隱然制勝猶金城賴弱翁  
之主斯淝水盡安石之謀一段雋功近年未見某苟逃

曠責喜極對敷畫捷傳聞既稍息風烟之警冬防戍撤  
願令賦雨雪之歸

詔書獎諭謝宰執

邊圉捷聞僅追風寒之責宸廷詔獎過形雲漢之章端  
由節廟之主盟陡覺閭垣之改觀叨思過寵揣已增慚  
伏念某以庸繆才任經理事芟除榛莽雖還南雍之封  
疆蓬勃煙埃幾歷中山之歲月強敵相望於數舍狡謀  
寧免於肆窺幸而一卻於春水方生之時不圖再誓於

北風其涼之際賴三軍賈勇出區脫以窮追而半夜斫  
營碎輜輳而亟遁因人成事惟帝念功頌臣力何有焉  
微公賜不及此恭惟某官恢洪雅量指縱神謨加惠窮  
陋示稍增於意氣折衝勅敵不自有其勲勞密啟睿聰  
致頒溫旨第戰士正希於優渥在藩臣曷稱於光華祇  
誦衮褒益慚綿薄猶士燮之勝城濮益為晉憂有弱翁  
以謀先零庶銷漢患

謝陳中書四六劄

島夷納款晉律何功禁掖演綸過褒示寵服王言之獎  
借感儒碩之主盟恭惟某官經緯斯文彌綸兩制元良  
天下之本方資羽翼之忠太學賢士之闕正賴甄陶之  
化一條冰之輝映五色線之胸襟居人間風日不到之  
鄉將儲大用念嶺外霧潦相蒸之地俯錄小勞致勤鴻  
藻之發輝侈被龍光之赫奕祇慚綿薄莫稱袞華某拜  
手誦言拊躬愧悚禮云折俎厥有平原督郵之彛辭曰  
濡毫敢效翰林主人之獻瀆尊不腆麾頓為榮

謝劉中書四六劄

兩階進律不稱敢辭一札成文弗俞有命服綸言之獎  
借知匠手之發輝恭惟某官四海後村斯文前輩數正  
元之朝士皎若晨星草建武之詔書溫如春日方帝學  
藉緝熙之益而皇猷歸潤色之工不是監不是卿紫橐  
已聯於侍從可為將可為相金坡必貴於文章豈惟河  
西羌壯素所討論將使山東武夫聞而感泣俯憐孤立  
獨犯衆難致勤鴻藻之褒嘉侈被寵光之照耀宣昭上

意勉厲後圖某拜手誦言拊躬愧悚將循牆而載請異  
此厦之終依問翰林主人當有濡毫之故典命督郵從  
事敬伸折俎之菲羞不腆瀆尊敢祈麾頓

可齋續蒙前卷二



欽定四庫全書

可齋續稿前卷三

宋 李曾伯 撰

奏申

乞免兼湖廣總領奏

壬子十二月

臣猥以庸才繆叨重寄艱難早歷衰病驟侵今年五月八日六月三日兩嘗奏申朝廷乞令休致未蒙從欲繼以秋防之逼迫乞於歲晚以許歸亦控之廟堂矣今茲適值鄰柝之警固非辭避邊閫之時臣未敢上瀆睿聽

惟是制臣掌兵餉臣掌賦中興建置初意職守相維頃  
年京湖因以生券屬制司蒙朝廷尋以閫臣兼餉事要  
是出權宜之策不可為經久之規循習至今通融雖賴  
每當羽檄倥偬之不暇重以金穀浩穰於其前心力既  
有所分籌畫豈能備盡必如異稟乃可優為臣蓋自共  
二以來常懼滿百之謫每惟國計盡正官名俾主餉者  
自任調度之司主兵者得專封守之責是乃復祖宗之  
制亦可分兵財之權臣久欲控陳願與釐正今既未遑

於即去自惟艱任於兼司欲望聖慈宣諭輔臣將臣先  
次免兼湖廣總領別選時髦共濟國事所有制司管認  
每年戍軍生券自今併歸總所令照舊來格例任責供  
億容臣專意閫務以俟旦夕敵退續申前請不勝公私  
之幸

乞休致奏

癸丑三月

臣自去夏丐休未遂比者具奏先乞免兼總餉伏準省  
劄奉聖旨依已降詔不允不得更有陳請臣祇服聖恩

感激愚悃誼當罄竭駑力圖報鴻私竊緣臣自幼而歷險及老而易衰一紀橐班三仕閭寄寵踰而量溢績寡而罪浮以一身則憂慮成疾寢食弗安以一家則骨肉凋零宗族淪落每自傷於薄命寧久保於幻軀此在微臣尚自私計乃若膺疆場之責未能寬宵旰之懷舊壘甫葺新敵方張雖南北氣運之將回猶東南聲擊之未弭揆勢而論腹背俱所當防苟情不孚首尾何以相應況事力莫求其可繼而物議多異乎所聞有能知微之

幾得不先事而懼臣數有微幸天實佑其衷一或踈虞  
人豈待以恕願身何恤誤國是憂若非新連帥之謀無  
以作三軍之氣言之至此豈惟臣之餉權當免而制權亦  
當更兼臣願祈休致不在今日平時自知賦才不穎愚  
分惟有早退為宜用敢不避天威再控前請伏望聖慈  
憐臣懇切出於由衷察臣樸寔非是避事為國遠慮及  
時改圖宣諭大臣檢舉臣去夏所請許令休致投畀寬  
閒實拜隆天厚地保全之賜

再乞休致奏 癸丑四月

臣乃者再具奏申乞許休致今月二十七日準尚書省  
劄子四月十二日奉聖旨依已降指揮不允不得更有  
陳請臣一介邊臣屢瀆穹聽自知凌犯之罪宜在誅斥  
之科曲加海涵未忍沙汰顧念猥當於隆委豈敢自棄  
於明時實緣臣共二閭餉以來閱三暑寒於此精慮已  
耗事力已殫分劑已盈伎倆已竭近得痞眩之疾未有  
醫療之方往再而少餐怔忡而多忘察脉觀證靡遑身

計之恤揆時度勢實惟職守之憂與勅敵方相應酬如  
病軀其能撐拄貪榮無已因謂之安挺災愈深殆不自  
濟失此春事休而弗去惕然暮氣隋而弗支再用祈衷  
終冀得請伏望回乾坤之大造圖疆場之新功改畀當  
材俾釋重負俯從休致退保餘齡不勝感天荷聖之至  
三乞休致并薦代奏

癸丑五月

臣自去夏五月以來已三乞休致兩丐免餉未蒙俞允  
近者四月二十八日又嘗再具奏申乞從休致伏念臣

么微邊吏前後累瀆天朝只當跼蹐以俟斧鉞未應再有陳請竊緣荆閬與蜀相連利害相關情分不可扞格臣自去冬屢稟廟堂乞選差蜀閬相孚之人來鎮荆襄以通脉絡從臣善替而去今者連睹邸報余晦直華文閣知鄂州兼湖北運判朱申直煥章閣湖北提刑是二人者昔皆與蜀閬同仕淮幕屢當煩使見謂時才如申則中外皆知蜀閬久薦為代晦則嘗歷尹卿資望已高今蒙朝廷起家持節當路誰不屬目在臣知有協恭第



臣疎直無能叨竊已過壯心凋落病體支離前此抗章  
納祿猶恐朝廷擬代未定脩聞晦申之除其才皆可當  
一面者非特可使帥蜀亦可帥荆擇其一俾代臣去必  
能辦王事穆公論傳曰日中必昃操刀必割在朝廷不  
於此時早為易帥之謀他時倉卒始議更張臣身不足  
恤深恐上誤軍國噬臍無及謹不避雷霆之威用再伸  
犬馬之悃伏望聖慈奮乾剛之斷早賜處分檢舉臣近  
奏特令守本官致仕速與命代朝廷若以臣不合辭職

不敢避罪但得上流間寄得人仰寬顧憂臣雖獲譴其  
甘如薺

貼黃

臣三年守荆恭奉廟謨經理襄樊郢三城幸皆就緒連  
年征築並舉調兵攻擣仰賴國威師出必克敵入輒敗  
目前封守無虞在臣本無規避臣今來再疏之上猶恐  
朝廷以臣襄樊首尾未欲更易臣竊照往歲帥淮甲辰  
復壽春乙巳修泗州丙午罷歸亦只是經理兩年至今

安堵規模既定豈用翰取翰守必待翰死耶臣今雖告去一日必葺見為措置移屯催辦糧運決不敢遺後人之憂實緣疾勢事勢至此不容不去伏乞早賜處分施行併乞睿照

又手奏

臣不避鈇鉞之誅輒瀝危悰上千睿聽臣孤遠微蹤疎陋寡識自淮歸里已分與草木俱腐獨賴聖明保護投拭使令已酉蒙恩入嶺庚戌改命來荆去家五年雖罹

災患報國一念誓殫馳驅倬憑藉皇威保固封守中  
間寅奉廟謨經理褒樊郢之三城粗皆就緒輕兵出塞  
攻擣前後十有餘捷敵五大入輒為我師勦退凡此天  
幸是皆宗社之靈將士之力豈臣無能之人所克致哉  
今者事會方殷涓埃未效詎敢自為明時棄物所以游  
上乞身之請者蓋緣臣積憂成疾投老易衰智慮已窮  
分量當退近陳奏疏已控悃忱其有精微未罄不容不  
密為君父告蜀之情分策之事勢是也所謂蜀之情分

則既在鄰閭利害動皆相關遇有邊隙緩急其可弗應  
竊窺近事殊切隱憂凡所移文務立畦畛矧聞睿意之  
俯蜀豈不形迹之愈疑臣固謂朝廷須當擇所相孚使  
之來荆共濟無事則脉絡貫通有警則聲援聯接不然  
彼此不相為謀或至貽入腹之患則必以扞格誤事矣  
所謂襄之事勢則昔未修築猶可委之荆榛今既經畫  
則當保其壁壘有功弗賞誰復向前無力乏供何以善  
後每聞廟論之所及動以費耗而為言臣竊謂朝廷盍

早謀易帥使之往來相度當守則力加扶植當捨則別作規模不然中外不相叶力或至敵乘吾間之慮則必以猶豫敗事矣即此二說有一焉已不可況兼之乎臣去則皆可新圖回之畧留則深恐貽倉卒之憂此其控陳不容但已前雖屢申籲天之瀆恐猶未有擬代之人今得當才適稱斯選臣已具公奏外伏望陛下俯鑒愚衷特賜神斷早新上流之任曲全餘恩之歸實利公家匪徇私計惟聖慈亟裁處之冒犯天威罪當萬死臣

無任激切屏營之至

四乞休致申省狀

癸丑六月

某再具奏申乞令守本官致仕六月一日準尚書省劄子五月二十日奉聖旨依屢降指揮不允不得更有陳請某疊瀆震威自應誅斥存塵淵聽恐重愆尤固不敢再有干犯竊緣蕃宣重寄非材莫勝玩愒罔功其伎已竭維此六月比及三年物理既盈人事當止孤蹤衰病證狀益深累䟽控陳悃悃具見載念平時稍自知分不

特今日而始丐休實恐疲軟上貽誤國之憂非欲退閒  
自為全身之計矧聞鄰閭之報實與年事之同人命脆  
薄朝露其危敬情窺覘秋風不遠不及此從容而使去  
恐出於倉卒而莫支用布由衷仰異從欲伏望鈞慈更  
賜敷奏檢照自去年五月以來節次奏請特與曲從休  
致端拜生成引領化鈞跼蹐俟命

辭免端明殿學士奏

臣今月十三日準省劄六月四日三省同奉御筆賈似



道除資政殿學士李曾伯除端明殿學士王埜除煥章  
閣直學士職任並依舊臣聞命渙頒撫躬震懼臣竊惟  
黜陟臧否朝廷所以昭用人之公進退辭受人臣所以  
厲事上之節苟罔功而與之加律及求去而顧使得遷  
豈惟私情之弗安亦恐公論之未穆矧如書殿又越從  
班近世多處於名卿微臣曷膺於異數載念臣三年受  
任何補消埃屢疏丐休冀老邱壑雖近奉勉留之旨嘗  
存陳懇款之情鞠躬盡力懼弗克支序情閑勞望所不

及脩與二三臣而並擢其於衆庶見以謂何倘以上命遽受之則是前請皆僞矣用敢效循牆而控避庶無重負乘之包羞伏望聖慈俯察愚悃收回自天之渥曲循累月之祈免躡華階俾全末路臣不勝幸甚

再辭免奏

臣蒙恩除端明殿學士職任依舊嘗具辭免今月初十日恭奉詔書不允臣莊誦睿訓感極衷竊惟承明進直儒學至崇疆場麤官夢寐絕想恍然渙號之布重以

巽令之申盍克欽承詎敢再瀆然念受之而已不覺其  
憊則稱受之而人或議其非則危顧護塞之績蔑聞援  
鄰之除方被一旬之內再命有華臣累疏求免官而今  
乃遷官連年異辭職而今乃加職雖聿昭於上眷未必  
察於人情況蒙丁寧訓告之辭將資掎角表裏之助讀  
而至此益切悚然深惟三邊事勢之隱憂不在一介官  
名之增重地廣則責亦廣恩深則報宜深倘冒寵而居  
之至揆力則眇若何以副隆委何以答殊休徒貽曠瘝

上誤簡拔用存伸於偃倭庶免速於顛隳伏望聖慈俯鑒愚悃收回新命姑仍舊階願畢力於秋冬異寬願於宵旰苟全封守俾遂歸休不勝幸甚

三辭免奏

臣近具奏再辭免新除端明學士恩命七月二十三日奉聖旨依已降詔不允不得再有陳請臣戴恩深厚自念欽承揆已倖盈不容忝竊載惟君王之命臣子有辭或出於真切之情或姑為文具之請如才位相稱官職

方來特為備禮而言未能忘情於祿是之謂文具若所謂真切則精力已竭實欲辭榮責任弗勝分合知止素有退休之志一無矯枉之私此則非虛遜也臣自去夏至今春願致為臣已不一疏公朝不以其亡狀而進之隆階人已為華已則大懼況已奉丁寧之旨未敢避馳驅之役驟頒異數却非本心目今西檄紛來北謀踵至正慮秋防之事上貽旰食之憂或者重以官名豈若增之事力倘毋誤國始克保身慮患或踈寵榮何有矧累

形控陳曰去今一叨陞擢則留私心豈能自安公論亦將弗恕用敢不避再三之瀆以祈寢免伏望聖慈俯察由衷之禱毋拘反汗之嫌收回新命以穆輿論俾臣安心職業圖濟事功不勝幸甚

乞休致奏

甲寅三月

臣不避天威輒布忱懇上千聖聽臣一介疎庸絕微識略再蒙簡拔謬玷蕃宣既兼領於賦興且復任於鄰援恩深寄重才薄報輕雖揆時度力倍費支吾而鞠躬盡

瘁敢計私便竊緣臣自幼而侍先臣丙寅之難及仕而  
從諸閫幕府之遊垂五十年徧歷邊役近十餘載游領  
帥權血氣以病而耗齒髮以老而凋智慮以憂而衰筋  
力以勞而竭自知無能於世用矣奚益惟有早退則吏  
議可逃頃由受任於江淮固已請休於田里矧今忝竊  
愈更滿盈城襄已三載而粗可為後人相繼之規來荆  
跨五年而已過於連政在任之日此而不去幸豈可常  
兼臣爰自前春迄於去夏屢嘗抗疏乞致為臣屬上訓

之諭留復許時之玩愒貪榮弗止招咎必然此聞治幾  
有延燎之虞而私家且貽番病之撓賤軀亦疾踰月未  
瘳茲驚懼而靡寧殆退避之無所臣又竊思守淮堞之  
日歲丙午以前臣珙收荆臣玠鎮蜀今二臣皆已淪謝  
顧一息豈能久存倘非力祈憫恤俾義命之早安將恐  
上誤委令徒身名之俱喪用殫懇切仰瀆聖明伏望睿  
慈曲垂淵鑒憐臣出入艱難之久察臣前後祈退之真宣  
諭大臣亟謀新帥容臣以本官休致早得善去凡餘年



之未盡皆大造之曲全

再乞休致奏

甲寅四月

臣比具奏陳乞令休致四月初三日恭準三月十九日  
詔書不允者臣祇誦訓辭感深涕隕竊惟三邊科瑣在  
臣子正合報圖一介丐休此君父所未矜許然念義所  
當為者固不敢徇己力有弗逮者又不敢隱情重惟衰  
庸之孤蹤早歷艱難之多故周旋兩閭跨涉十年所至  
公上必收其利權未嘗封內不有於敵難率奮空而葺

廢勉扞侮以支危賴國威靈不至曠敗怨臣精力則已  
殫窮若方之古人是詎能為役歔然何恃寧不自知茲  
願為首邱之狐庶免類東野之馬抗疏蓋屢陳於兩夏  
鮮嚴且又過於一春而況罔功叨榮積慮成疾事會無  
極天幸豈常物理惡盈人情浸玩亟去則可新上流之  
規畫倘留必將誤兩道之委令抑有過憂不容縷述用  
忘微分洊瀆睿聰伏望聖慈俯鑒真悃速圖時髦受任  
之計曲遂微臣知止之私俾乞餘骸少休晚節實戴隆

天厚地生死肉骨之造

三乞休致奏

甲寅四月

洵承君命深惕愚衷退惟共二之罔功豈敢再三之有  
續第念臣本無智略誤任蕃宣歲月於邁血氣浸衰事  
會方來精力已竭一春多病連月未瘳當羽檄倥偬之  
在前而藥裹扶持之未暇賴國威之震耀底封境之肅  
清蒙恩勉留眷眷若此畢力報效臣職當然但以叢數  
責於已而益負荷弗勝閱五年於今而愈運掉不去兵

以風寒之多備財非天雨以莫支倘若縷陳祗類繁紊  
強敵茲水生而始去謀言將冰合以復來近雖三入三  
敗亦幸而成然而一勝一負何常之有將預圖於保固  
正宜示於作新臣伎倆淺而恐已為強敵所窺事力單  
而亦且為將士所玩頑然弗退決是可憂幸值目前當  
撤戍之時委是閫外非養痾之地用殫寸臆疊冒咫尺  
伏望聖慈俯憐危惓察其累歲弓休之真切早為上流  
圖任之選掄保全餘生僥倖善去仰戴天涵地育九殞

莫酬

四乞休致奏

么微遠吏自揆罔功憑恃上恩所祈善去瀆至三而未  
許謫滿百以奚逃固知多事之時殆非乞身之日然念  
臣之事君如子事父力有所不能則當告情有所或隱  
則不忠臣本無他長僅知一樸出閩入從志滿分盈十  
數年前已願納祿四載於此累疏具陳乃出由衷非是  
文具今之齒髮衰顏之益甚骨肉零落以自憐百憂薰

心一身是病雖動作常人之無異而纏綿厥證之愈深  
即事會之正殷何精力之可應勉弗去顛踣必然不  
足計犬馬之軀所當防虎狼之敵兵家無常勝之理鄰  
患兼浸迫之憂有備則可以無虞無具則何以能禦天  
幸難恃日力無多此而弗圖患且將及有不容不歷數  
以告者京湖頃年未復襄郢遶而江北大屯惟在江陵  
敵猶約我以和朝廷以人為重有請必從無賞或吝今  
二三年間備禦廣責任重無幾敵不入而乃事多掣肘

人有玩心舊比不可以攀援新制動有於牽礙將帥間  
有望望然去者矣此一也京湖生券錢米自孟珙管認  
始年科米三十萬石繼而歲減十萬連年以來添供均  
隨光郢等戍所科乃亦上是計約寶祐元年歲支至四  
十餘萬石除所科之外皆用鑿空倚辦將何以繼此一  
也而況今歲所科前項常年生券米二十萬石之內朝  
廷又令以屯田黍粟折支八萬石前比之所無此既不  
可支作軍食糶錢糶米則又不及況制司又有供給軍

將物斛歲亦約用措辦二十餘萬小有不登果何所措  
此一也又如襄陽經理以來科撥生券錢米已歲減一  
歲本司添貼應接亦既罄竭連年奉命移屯軍人老小  
抵自今歲已共移六千二百七十六戶優支起發般費  
錢米共諛十八界會二十三萬餘貫米五萬五千石朝  
廷止科十八界會一十萬貫且準行下令榛移屯萬人  
是亦無力可及此一也茲四者皆制司之事不可為者  
乃若上流茶稅往年藉以通融貼助歲收甚夥自臣到



任歸之國用今江州分司歲收未暇計先來鄂岳置專  
官所取未暇計只以鄂岳兩場自淳祐十二年二月至  
今年四月收七百餘萬通而計之何翅幾千萬是皆向  
來總所所有也今無是矣此一也廣西經略司權行截  
撥運司庾司窠名錢充安邊軍券食前政任內屢狀申  
請科還雖未回降為數猶未多今計臣任內自淳祐十  
年至寶祐元年終已截撥銅錢二十一萬三千五百餘  
貫控告科還前後已三十餘次迄未有區處此一也又

如朝廷和糴司存每年當是陪貼為數浩瀚自前政已  
然近淳祐十一年分和糴已隔三載近因申請科還蜀  
糴銀兩都曹詹筆出豁糴價則痛減銀價則過增又支  
過本司銀兩不與理還願令椿管二百五十一萬今何  
所從出此一也茲三者又總計之事不可為者至於策  
應建司向來幾類虛名今實欲備援嘗攷舊事己亥督  
府調重兵援蜀非專藉荆旅自後六七年間歲調援入  
費不滿三千人秋去春還未至越忠萬以上今蜀事非

前比當此盛夏本司見調三千人在蜀又武定三千不  
預焉今去秋高深恐事出倉卒朝廷責令遣援則本司  
自有邊面敵或東西俱急其何以應此一也又策應建  
司素無財賦連年分下半年科十七界會一百萬支  
遣無兵事則可去歲調發支犒所科幾不足以給所用  
最是支過援蜀備峽人兵生券米以三萬餘石計錢以  
十八界會十二萬貫計是皆通融制總兩司那借應副  
近屢科請未蒙體恤此去歲已支者猶所不問今歲萬

一有所調用此項生券錢從何而辦此一也是二者又  
策司之事不可為者凡是數端皆關係大節如細故俱  
不敢及載念臣才具既不足以經理言語又不足以感  
孚一日恐誤朝廷則敗國事此荆楚重任又不容不更  
張而措置者臣聞昔人有憂及時事者而謂由吾曹貪  
名位所致臣嘗服其言不職當去其敢自恕必待狼狽  
大壞而言公朝雖欲保全之晚矣用敢瀝血忱以告睿  
聰伏望聖慈察其憂國之忠恕其觸天之罪檢照臣連


年累請特令守本官致仕別選髦雋亟濟艱難則臣死  
日生年戴恩罔極

五乞休致奏

臣比陳一介蝼蟻之悃屢觸九重雷霆之威地育天涵  
弗加之罪朝奏暮報仍命曰留斯萬死不足稱酬而一  
身豈遑碩恤第念臣職兼三而支吾浸不逮辭再四而  
剖露蓋已窮火將然而因謂之安屋且漏而知之在下  
上流之事今類於斯揆才曷副於濟艱積憂徒致於成

疾往萬彌月倏忽又秋上命既不可終違臣愚實未知  
攸屈臣竊謂器有受擔石之量而擬之萬斛則豈勝焉  
有僅十駕之能而責之千里則必敗大槩用人不可使  
踰其分列職不若專思其憂茲懷歸既畏於簡書則受  
任願寬於轡策用殫愚臆洊瀆睿聽伏望聖慈宣諭近  
輔檢照臣節次奉申熟加裁處如蒙許休致改圖新帥  
興起事功則不勝公私之幸其若未忍斥棄尚俾存留  
則乞別選餉臣以分其兵財之寄免兼策應以畀之威

望之臣僕畢防冬却容請老則臣敢不惟命是聽



可齋續彙前卷三



欽定四庫全書

集部

可齋續藁前卷

五四

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官學正臣湯垣

謄錄舉人臣李逢泰

欽定四庫全書卷

可齊續藁前卷四

宋 李曾伯 撰

奉中

奉詔舉帥材二人

照對臣準尚書省劄子五月十八日三省同奉聖旨令  
內而侍從臺諫給舍外而制閫各舉帥材二人者臣竊  
惟薦材難薦帥材尤難古者方召遠矣今夫謀三軍之  
帥將以備一時之選睿旨誕頒猥令薦進豈不以觀臣

謂其所主惟善能舉其類乎願臣本無材略忝任藩翰  
揆已不足安能知人為之踰月儀圖其位望之已著者  
固不待微言之推敷其聲名之未達者則有得於共事  
之更歷今有二人焉竊見朝奉郎前知建昌軍事余鰲  
自任高郵尉而留淮幕臣見其諳軍民利害得將士心  
頗顯昂昂有遠到器議論本乎正大趋向不為卑污臣  
命夏舉修泗上承下接皆鰲贊之最一事尤有識往時  
鰲初擢第值遣使諭蜀道拉鰲偕行恥於依憑甘以吏

事自見臨節而不可奪於此可占今稍更霜露才氣殆  
益老矣宣義卽通判襄陽府兼京湖制機王登昨以种  
歸尉而留荆幕臣見其曉兵家韜略通當世務磊磊落  
落無罷軟習政事多所規益言議不為依阿臣命高達  
復襄左撐右拄實登佐之最一節尤可書往時登以勇  
爵因獲俘詣荆閫怒登不拜翻然舍去卒以儒科自奮  
有志事竟成於此可觀今久在風寒文理浸加密矣是  
二人者臣察之已熟故敢薦之不疑抑又有說焉馬廐

金懷之無取則可以臨羌桑株田頃之弗多則可以慕亮如鰲如登臣嘗與之誦論及此使遂展布必可保其能自廉飭臣愚欲望聖慈下有司籍記姓名特加旌擢以為事任之儲如後不如所舉臣甘坐謬舉之罰

乞預備蜀奏

壬子

臣自近聞蜀警連得蜀閫十月初三十六日公文關報頗緊已具錄奏聞中間得歸峽二郡守書報到事宜則已緘呈二相必皆徼聞睿聽臣今日再得歸州權守鄧

益二十四日報傳聞賊勢十三日已近重慶佛圖關過江津此報恐非端的雖未敢信然有聞不敢有隱臣竊惟重慶一城介於兩江之間形勢險固賊所難窺聞臣十年經畫必能防勦此若未足上勤宵旰臣之所慮則蜀之支徑不一最是自夔至渝中間忠萬涪安地里延袤徃歲已亥賊犯西邊督府調兵三萬控扼於此一帶猶有湖灘透漏之患今恐蜀之兵力分布不至忠萬下流萬一賊據建瓴之便用扼吭之智吳蜀脉絡關繫不

但為京湖唇齒慮而已臣近以襄均謀報臣測既自為  
境備又復為鄰憂臣已那調都統張禧等兵共四十人  
分往歸峽松滋措置水陸防遏又有澧州麻寮一路近  
通施南亦已差周公明先次量帶軍馬往諸關點視把  
守外臣區區欲聖慈密諭大臣寧憂先於事毋事至而  
憂豫為圖全之謀以備應急之着蜀安則東南可安惟  
陛下留神幸甚

貼黃

臣所據蜀報其言賊兵犯瀘南窺嘉定本司聞之道塗  
已自多日緣未得蜀閫公文不敢具奏今詳所報賊勢  
委是不輕臣之所慮冬日尚長西邊未知敵退之期中  
流懼有備虛之患如夔諸郡與荆為鄰聲息皆弗以關  
聞探聽未免於間隔目前重慶以下雖幸無警此賊倘  
因資力旋生姦謀安保不來其可無備臣雖為謀不當  
越境然慮患非止及鄰婺緯隱憂已具前奏敢望上留  
聖意宣諭輔臣亟思區處之策伏候睿旨



回御筆手奏

臣恭準宣諭以臣近奏蜀警特賜答諭臣伏讀聖訓兵法有云善守者不盡兵以守敵衝與夫別徑之可慮仰見皇明遠覽沉幾先物不止一隅之計深得多算之防臣拜稽歎服委非愚見可及又蒙神謨指授令多用兵船控扼蜀口多差間探體訪事宜有聞節節申奏臣猥任北門之寄適當西風之衝職思其憂豈敢不力前者自為境內之備固已列置峽中之屯此月十五日恭準

密劄指揮令本司整齟將士五十人審探緩急前去應  
援臣伏念夔據咽喉之要荆實唇齒之依聞命之臨即  
議趨戍若以赴鄰之急亟合調兵以前却緣自得蜀閬  
十月二十五日公文以後未有續報臣得之體訪近多  
傳賊勢之西向却未越渝境之下流又夔門有榜備蜀  
閬報謂軍當得捷敵且多度臣恐是其事少緩未得其  
的以此一面整辦備援補戍之師移文蜀閬以審進發  
委官夔郡以辦糧食已於十一月十六日奏聞外惟是

已具之措畫上是豫為援鄰之規方來之應疇又當益  
思保境之計前奏所具補戍軍馬若有緊急臣又別當  
那摘精練將士添調兵船前去歸峽一帶控扼如其他  
險隘合防把路徑亦已逐一行下所屬申儆增戍外所  
有體探事宜前者雖屢遣人往探聞機秘密道聽罕真  
今兵調既有相關探候其敢弗廣若事或緊急切雖未有  
蜀聞關報臣自當隨宜應接謹容陸續具奏

袁陽獲捷手奏 癸

臣非才分閫奉命復襄兩年之間征築並舉敵騎不敢輕入近謀知彼國新遣舒穆魯錫里達魯噶齊等軍馬欲謀今春窺伺正此隄備正月二十四日古納圖過漢江據攻襄城其勢不輕其謀叵測敵意本欲哨江陵入均房抄掠以為攻襄計幸賴陛下德格皇天威震殊俗將士僇力思奮敵兵終至西柳關萬山隨出與戰敵兵小却即乘其渡漢未畢下營未定賈勇追勦之自晡至夜助以風雨遂以三千之師破三萬之敵兵溺江填港遺

棄資糧器甲三十餘里奪馬四百餘匹俘擒敗卒斬獲首級所據通判王登前一書臣先已封呈左丞相今再得登書所言尤詳敢是此夜敵兵敗遁渡漢駐岸自相蹂躪允謂天助非但人力臣周旋江淮荆蜀三十餘年屢見敵人侵軼未嘗有此捷其速如此所謂擊蛇必擊其首是捷有之一行將士委可嘉尚臣已別具公奏外今將王登親劄繳連上徹聖聰臣見委官往犒取索功帳續申伏望睿意先次宣諭大臣特降指揮優異頒賞

以為遠頭干城禦侮者之勸所有向武當一路兵馬觀  
王登書尾亦自頭回惟恐尚有後哨已令驅逐

答宸翰手奏

臣恭準降下御札臣薰香端笏拜恭誦仰惟奎文陸離  
天語溫潤聿昭遠覽丕顯聖謨臣么麼疆吏何以上稱  
睿眷私心感激至於涕隕臣伏讀聖諭以臣今春襄城  
奏捷商州擣虛寵以嘉獎此則宗社之靈將士之力也  
臣幸而追責其有何勞至若聖訓以臣累疏求去於全

身之計得矣者人不以敵遺君父者正不如如此臣猥任  
閫寄獨荷主知捐軀報國固分當爾抗章引退以疾使  
然亦由情分以扞格是虞事勢慮猶豫而失乃者僭陳  
於薦代亦嘗密啟以祈哀咫尺威不違寸臆已罄臣方跼  
蹐以俟陛下俯加訓飭未忘擯捐上恩如斯臣豈敢負  
正以不遠秋冬之備恐貽宵旰之憂強顏其留掣肘將  
甚乘此中權之改畀庶幾西顧之可寬此其本心非敢  
避事臣又伏讀聖訓襄城守備宜益加嚴夔門襟喉實

有關繫朕將作新規模卿更深謀遠慮式展壯猷以副  
眷委之意臣仰見陛下明見萬里慮周四方不以微臣  
之非才俾圖上流之共濟臣雖無能為役其敢弗欽凡  
而職思其憂義固必葺惟恐謀不越境力所弗加臣又  
蒙聖訓戒臣乞身祈間勿復有請臣自當遵奉之惟謹  
所患衰病之難支累形控陳拱俟處分伏祈聖造俯徇  
愚衷倘犬馬未填溝壑誓圖銜結以報生成所有臣今  
月初八日所奏事理伏乞早賜聖旨施行



謝宣諭奏

臣今月九日恭準宣諭卿辭帥蜀嘗見諭旨不復相強  
且護上流以俟旌擢臣守荊罔績每懼曠瘵帥蜀掄材  
豈堪委任比輒伸於懇免蒙曲賜於矜從臣雖願還首  
丘嘗具見累疏洊被勉留之旨敢懷願避之私冀遐譴  
呵詎希進擢知撫躬而感惕誓竭力以報圖俟畢防秋  
乞容請老乃若聖諭以臣薦漕憲為代閩寄不輕更易  
臣不揣引類實出由衷蓋以時事正當丞弼之相扶人

才可無重弓以為備一時近取二士足當用瀆聖明以  
聽裁擇雖古云舉偏不為黨然此則知臣莫若君尚祈  
聖度之宏俯諒臣言之僭臣又伏讀聖訓廟論必主耕  
屯卿宜加勉科降雖曰不及所在皆然未宜因是求去  
臣恭誦至此感涕以之蒙聖恩若是之主盟豈臣職敢  
怠於規畫臣之危懼前以控陳司存利請此特一端廟  
堂扶持自無遺慮所謂屯田之當務是固邊餉之所關  
見今軍民雜耕然須歲月見效便為指擬恐有闕疎昔

如趙充國之屯不廢景壽昌之糴欲羌人之不動必穀  
斛之多儲失時弗圖嗣歲徒咎要豈無於良策其可徇  
於虛名臣因聞廟論亦冒貢愚衷伏望都俞之間更賜  
詢謀之及此又非特為臣區區去留計而已激於憂愛  
進此斐狂出位而言頓首俟罪

乞於下流趙兵援變奏

臣今月二十日準省劄六月十一日三省同奉聖旨李  
某兼夔州路策應大使臣比者叨恩進律甫具異函簡

眷踰涯涘頌渙渥不以守邊之無效俾之越境以興謀  
以地勢而論猶齒有唇以朝命之臨若臂使指此何時  
也其敢辭乎第惟夔之關係莫重於方今荊州事宜亦  
異於疇昔頃值邊聲之文急毋虞情分之弗孚茲俾復  
於舊規固足覘於遠算顧臣智慮以憂而耗精力以老  
而衰豈宜辱軀又添重負兼襄樊荊郢諸壘今自有封  
守之責而澧峽沅靖間道且不勝蹊徑之防尺籍幾何  
局面若此重門擊柝猶恐不足待暴客纓冠被髮大懼

何以救鄉鄰矧其汴渝千里所在空虛越變一步即踰險阨有如往歲之援多調下流之師透漏猶見於湖灘浸淫幾失於峽口至今議者莫不憂之蜀事之利害臣固非所敢言國事之安危臣謂實繫此舉敵新聞於星隕時浸迫於風寒况聞謀者前後之言類謂敵欲東西之合縱未必有此然豈可忽諸在公朝雖復立一司欲倚以應酬非兵力則虛名二字恐無以捍禦深慮受朝廷之委寄不能寬宵旰之顧憂一跌弗支萬死莫贖臣

又聞道塗之餘論謂鄰閩於近時亦有防江之憂嘗申  
乞師之請是已知於謹備所當念於遺言沂險而上布  
置弗先聞警而圖調遣何及用歷攄於狂瞽以仰瀆於  
聖明伏望睿慈俯鑒忠臆宣諭輔臣速定廣謨於下流  
沿江等處整辦精銳兵力一項多則萬人少亦五七千  
人發付本司以專備變路緩急應援庶幾臣不但受策  
應之名可以副策應之實誓捐軀以報君父所有荆閩  
二三年來雖不曾魚領策應每歲循前例調常戍以防

歸峽蜀口元自不廢今見議區處俟秋防遣行續具奏  
聞前項策應大使恩命容臣一面消吉祇受管幹其有  
復置司存合行申請事件續容條奏

催區處援變兵奏

臣比蒙聖恩今兼變路策應大使臣以累疏丐休既未  
矜許利害關係不敢辭難以於二十一日具狀聞奏但  
是蜀兵單弱變備空虛若非朝廷整辦一項兵力專援  
變蜀恐無以應調此去秋防不遠所以申告廟堂早乞

區處臣見今涓日猶未祇領策應司職事今於二十三日忽得六月九日蜀遞承四川制司參議官文復之等以下幙府列劄以制臣新舊更代慮有乘間伺隙欲得本司調兵六千人進屯夔萬其辭頗激切臣已將文復之等劄真本繳申樞密院乞與敷奏處分外臣檢照京湖制司往年未發策應使時體例淳祐七年調兵二千五百人差都統同昂總統入蜀內一千五百人戍忠一千人戍夔淳祐八年調兵二千人差總管劉儀總統入



蜀一千人戍夔一千人戍忠淳祐九年調兵二千人差  
總管焦進總統入蜀分戍忠夔承四川制司公文以邊  
面肅清請免發援遂即回戍近年既罷策應司後朝廷  
指揮仍令每年應接淳祐十年本司差軍二千人令焦  
進總統分戍歸州以東一帶淳祐十一年本司差軍二  
千人令崔安等總統分戍巴東歸州一帶淳祐十二年  
本司差軍二千五百人令都統張禧等總統分戍歸州  
巴東內令五百人戍巫山切照前後六年體例其策應

司未罷之前與既罷之後皆不過歲調輕兵一項以備  
變援並未嘗及三千人之數蓋緣京湖自有責任兵不  
容多輟變蜀未有警急亦不待他援今來荆蜀事體皆  
與昔殊若如蜀幙所陳欲遣重兵以往自非朝廷檢照  
已亥以前體例於沿江下流調遣精兵進屯備援則在  
本司委無此力伏乞聖慈宣諭輔臣早賜處分以備緩  
急庶免於誤國大計不勝幸甚

恭稟宣諭援變奏

臣今月初六日恭奉聖旨宣諭令臣凡百應援蜀中已降指揮調兵二千人入蜀早宜發遣臣肅奉睿謨恪遵惟謹協恭鄰閫共濟當然臣近者六月二十日恭準省劄除臣兼變路策應大使於二十一日已具奏請於六月二十三日承四川制司牒官文復之等列銜劄子欲調兵援於當日又當具奏陳臣所言變蜀利害及京湖應援始末具載前項兩奏伏想皆已上徹聖覽繼而六月二十九日準樞劄備余置元申令本司整辦援蜀之

兵又於七月一日準樞劄備文復之等所申令本司整  
辦萬人聽候調遣入蜀分屯臣皆已遵稟具申樞密院  
去訖臣竊惟往者京湖雖置策應夷攷六十年間歲調  
軍馬入夔未嘗及三千人是時既無邊城之責亦無鄰  
析之警彼此殆以故事相應今來將備實患不同往時  
其令遣調於援兵不過能做於近比蓋國事所在固當  
不分於畦畛而兵力有限亦欲自保於封疆臣今者所  
準睿旨令遣調二千人入蜀仰見皇明洞屬廟算無遺

臣自昨聞上命已於所部那摘精銳軍兵陵江二千人  
鄂州一千人見行整齟祇備只俟權帥程逢辰續有關  
報即當遣調但京湖氣力以目今邊面擺布輟此三千  
之外其它戍守已難再有抽摘臣僭有一得之愚正欲  
具奏臣妄謂東南頭目在蜀咽喉在蜀變賊兵去敵犯  
益梓利謀謂今敵將謀犯變雖難遽信豈可無備今變  
之守帥未定變之城壁則難恃變之兵可用者僅二三  
百人變之糧食見在者不過五千石是皆見於田德寶

近狀之所言此四者切於守變急務及今不為定論後  
將孰與任責伏望宣諭大臣速作處分臣更有愚悃臣  
雖兼策應遣援伎倆止於常戍不敢虛言欺誕以誤陛  
下具兵力一項不多辦則恐敵或大至杯水救輿薪之  
不足不豫調則恐事或倉卒大寒索衣裘之無益己亥  
湖灘之釁督府調兵二萬入蜀應援舊比可考今蜀兵  
弱於昔荆備多於前若非朝廷令調軍馬一項專備變  
援徒仰荆旅以壯聲勢必賊不至則可賊小入則可

若或賊以大勢分道侵軼以三千之師安能布置江面  
之千里關隘之不一乎此微臣縻縉之憂晝夜之不能  
已也臣近上廟堂劄且乞於江州調精銳軍二千人黃  
州調武定軍三千人湊作五千人委一名將統之只在  
八月間便令起發且來江陵屯駐以觀賊勢之所向若  
上流急則趨戍而進下流急則順流而下東西運掉此  
亦活法庶免臨時呼喚不及之患其於今年隄備夔蜀  
要無易此策如醫之必用此劑醫此疾也伏望聖慈併

諭大臣速計而施行之

貼黃

臣前所請調兵備援非為京湖計乃為夔蜀計也今所  
準指揮未蒙體察而朝廷備辦萬人之令蜀閬趣兵六  
千人之檄排日踵至固知所措切照京湖地分往年邊  
城未復策應司所遣歲且不及三千人今所部自有封  
守兵力敷布正恐不及援鄰之戍豈能倍遣本司除前  
項見調外繼此委是難以再摘所願宗社威靈賊不入



變則彼此俱幸萬一果有窺伺豈不甚危險阨一失則不可禦矣臣請言往事為鑒辛卯冬蜀未大壞荆乃全盛是時桂帥蜀陳帥荆桂請援於朝命荆遣援調宋春以兵三千戍金州臣時以蕪牾責備戎行當其朝論閫畫皆謂敵豈能涉吾境直欲假此虛聲以却敵耳一旦突至孤軍弗支荆聞隨遣孟珙以精銳萬人守拒門亦無益矣向使賊未出平地荆果實欲援蜀不以輕兵幸試便以重兵過險賊不可過黃金渡透饒風關矣至今

論者有遺恨此乃臣之壯年身所親歷者今猥當此寄  
不謂復任之事倘又作此調度賊不至則已賊至而小  
有疎失豈不為誤國之罪人用敢罄其衷臆以為朝廷  
告伏乞檢會臣累陳過為備豫之計早賜處分照乙亥  
援蜀體例速調沿江重兵以備西援臣自當斟酌上下  
流緩急以議進退

回庚牌手奏

臣比以榦方無補連歲丐休嘗具奏函渚申懇請意戎

事之少靜祈聖恩之曲全曾弗踰時乃脩告警蓋緣敵  
懲去歲之再衄茲舉忿兵而肆侵以察罕老將親行非  
塔剌新進輩比今自渡漢亦既涉旬雖未逼於襄城傳  
已透於均境兵勢孔熾費糧亦多天色久晴登麥不遠  
竊恐機謀之叵測尚須盤泊以相持臣已戒遼城聿嚴  
備禦不可喜功而輕戰務為持重以圖全見調防把之  
師拒敵於漢濱牽制之旅攻勦於山路諭農民以遷避  
厲將士以關防仰憑宗社之有靈期保封疆之無失臣

已日具事宜申樞密院正懼上勤天顧臣罪當誅今月十九日伏準庚寅奉密劄恭被調兵西援之旨臣敢不恭奉第以襄方兵擾黃復哨聞正切門戶之憂又急鄉鄰之援容臣支吾略定應接敢稽已即致書晉德恭傳上命俟其啟行定論自當斟酌遣調惟是臣以蕞爾疎庸之跡當此紛然膠轕之衝非惟臣晚年心力之已殫亦覺臣今歲氣數之不順所陳休致固慮滿盈望早諭於大臣亟別圖於邊寄俟敵出境許臣歸田得逃司

敗之刑實戴更生之賜

回御筆手奏

臣比準庚郵遣調西援適因邊警輒具奏聞上觸雷霆之威正深淵冰之懼四月十四日恭準宸翰從天而下熏香端笏拜手稽首伏讀聖訓以敵騎過漢踰旬恐當退遁臣仰見陛下智周物表明燭幾先洞識軍戎萬里之情預知吉語五日之至果憑神算遂折敵鋒載惟強敵之始謀大舉忿兵而加我觀遲回而在境疑盤泊以

涉時曾謂逼襄而不敢肆城下之窺侵均而乃隨取山中之衄項陳捷狀計徹睿聰大抵以寡擊衆皆程進之功據險拒敵則溫和等力願加勸賞嗣具控聞臣又恭準聖諭余晦以敵據古利洊奏乞師令臣早遣晉德步兵西上臣恭惟王事所在實同疚懷鄰警未寧豈敢緩視昨自一聞密旨即趣師期檄德赴司援兵往役器甲悉脩資犒加優近者初十日已從本司發遣而德尚駐公安消日就途臣十四日已備御筆旨揮再劄催促起

發德必不敢逗留矣惟是臣又伏讀聖訓以上流倚臣  
正切勿復上乞身之請伏念臣猥當疆場何補涓埃世  
受國恩未有報所主憂臣辱寧忍負之豈敢但知身謀  
不為公計實緣臣分盈而灾至年邁而病侵昔在淮堧  
今來荆閬皆值收釐茗之權以歸公上皆俾披荆棘之  
地而立舊疆犯衆人之難勉一日之葺臣之精力已竭  
於茲天幸夫豈可常人事蓋亦當止姑陳一二上告九  
重如去歲蜀援添費生券司存非天雨以曷支如今年

襄餽將備歲計指日失漲潦以何措倘扣呼而弗應則  
曠敗之必然是雖留臣正恐誤國兼以上流之事尤深  
或者之憂朝廷復建策司俾任應援此雖前比非所敢  
辭然邊面弗同往時而兵額不過舊籍是必荆常無事  
則力可相應惟慮蜀或有警而此亦弗寧則將自為戶  
牖之防何暇復救鄉鄰之急往聞督府增戍夔門多亦  
調之江淮非專藉於荆楚矧今敵謀益力蜀病頗深雖  
遠謀不能盡知如道聽則有可慮謂敵營侵迫謂我餽



甚艱謂不殺人以透吾民謂且設科以致吾士此漸成  
沉痾之證恐湏投瞑眩之方苟猶徇常則將滋劇若以  
微臣為可倚祗貽陛下之顧憂臣之難留亦以此懼臣  
近以專委僚屬稟告廟堂伏望聖慈上闕宸念速賜綢  
繆荆蜀之大計以為保固東南之遠圖宣諭輔臣別選  
良帥將臣休致俾老餘齡豈惟臣之幸實中外之幸

可齋續藁前卷四